

Setemèna de la Didatica al Museo Ladin de Fascia

L spetàcol "Stories de Fanes" e l DVD "Torre Aquila" ge dèsc luster a la prejentazion de la neva ativitàes del Museo



L spetàcol del Ream di Fanes portà dant chest istà te la Mont de Poza.

Sèn Jan - Ence chest an i Servijes Educatives del Museo Ladin de Fascia met dant la Setemèna dedichèda a la Didatica, olache na lingia semper più rica de proponetes desvalives per dozenc e duc i enteressè ge fèsc da cornisc a la prejentazion di neves percorsc e ativitàes per la scola. Dai 14 ai 17 de setember te la Sala "Luigi Heilmann" del Museo Ladin, vigni domesdi l'é pervedù doi referac sun tematiche desferentes per descorir e cognoscer miec valgugn aspec de la cultura e del lengaz ladin.

Se scomenzarà en luncsc co na pruma scontrèda su la particolaritàes de n museo "de" na mendranza e la carateristiches del lengaz ladin a cura de Fabio Chicchetti e Evelyn Bortolotti; en mèrtesc se rejonarà di ric da d'invern e en particulèr del carnoscer, co na lezion de l'antropologh Cesare Poppi e n percors didatich ad hoc. En mèrcol se jirà inant con n auter referat de

Cesare Poppi, che fajarà descorir la magia del mond de la lejendes ladines, e sobito dò se podarà tor pèrt al spetàcol de narazion e mùsega dal titol "Stories de Fanes", prodot da l'Istitut Cultural Ladin "majon di fascegn" en colaborazion co l'Ensemble "La Zag", con Giacomo Anderle desche narator e Noemi Iori desche solista. L spetàcol viventarà endò la fegures di ciantastories ladins portan dant, col didament de la mùsega, i evenc maores de l'epica di Fanes, mit fondatif del pòpul ladin, descheche l vegn contà da la scritora Bruna Maria Dal Lago Veneri tel volum "L Ream di Fanes", dat fora acà pech temp da l'Istitut.

Serarà sù la setemèna la prejentazion di neves percorsc e ativitàes de laboratorie di Servijes Educatives, compagnèda da la pruma proiezion del DVD "Torre Aquila" con mùseghes de Emilio Galante e tesé de G. Calliari e Simon de Giulio, prejentà dantfora da n curt referat de Lorenza Florian

sul renomà zicle de depenc a fresch del Ciastel del Bonconsej de Trent. Per maora informazion se pel jir a veder dut l program de la Setemèna de la Didatica sul sit del Museo a la direzion www.istladin.net. La scomenzadives, orides a duc i enteressè, raprejenta ence l scomenz del Cors de formazion per joegn operadores didatics e vides del Museo Ladin, endrezà da l'Istitut tel chèder del Projet Joegn Val de Fascia che se ouc a joegn dai 17 ai 29 egn. Chi che vel tor pèrt al cors, pel amò se scriver ite enschin ai 10 de setember con n picol cost de 20 €.

Desche i etres egn, fora per la setemèna dozenc e jent de post podarà vijitèr l Museo debant e aer l 20% de rebas su la publicazions de l'ICL.

Sarà donca dis piens de proponetes e scomenzadives, a encolorir n Museo che semper de più é dò a doventèr n pont de enconter e de scambie per duta la comunanza de Fascia.